

Cinco caso di apelacion relaciona cu desaparicion di Natalee

Corte Superior ta duna decision riba Diahuebs

ORANJESTAD(AAN):

Diamars mainta Corte Superior a trata e casonan den apelacion relaciona cu desaparicion di Natalee Holloway. Ta asina cu tabata tin en total 5 apelacion.

1. E apelacion di Fiscal contra e rechazo di Huez Comisario pa prolonga e detencion di Deepak Kalpoe, cu 60 dia mas.

2. E apelacion di Fiscal contra e rechazo di Huez Comisario pa prolonga detencion di Satish Kalpoe cu 60 dia mas.

3. E apelacion di Fiscal contra anulacion di e medidanan di limite den caso di Joran van der Sloot (lesa corante etc.).

4. E apelacion di Fiscal contra e decision pa admiti e abogadonan durante di e interrogacionnan di polis, den e caso di Joran van der Sloot.

5. E apelacion di Joran van der Sloot contra decision di prolongacion di su detencion cu 60 dia mas.

Pa e caso aki tabata tin un seccion extra Diamars, no regular di corte comun na Aruba. Esaki manera sa pasa mas biaha den un seccion irregular.

Corte Comun a pone e interrogacion di e personanan involucra na encargo di un di e miembronan di Corte Comun.

E miembro aki a bin for di Curaçao, a scucha e sospechosonan, e abogadonan y Procurador General y ta raporta tur locual cu a worde treci padilanti na e otro dos miembronan di Corte Comun.

E decision ta worde tuma



Deepak aki ta buscando forma pa drenta edificio di Corte, mey-mey di tur periodista para pafor.

despues door di e tres miembronan aki di Corte Comun.

For di Comienzo di e caso Griffie Isella Wernet a anuncia cu resultado di e casonan di apelacion lo worde duna riba Diahuebs 2'or di atardi.

Pa tratamiento di e caso Procurador General Fernandez Pedra mes tabata tey, conhuntamente cu Fiscal Mayor Karen Janssen.

Despues cu e abogado y nan clientenan a yega corte, no a dura mucho largo pa nan sali back.

ABOGADO DI SATISH:

Abogado di Satish Kalpoe, David Kock a bisa cu Fiscal no a presenta pruebanan nobo y e echo cu e caso pa cu su cliente no a dura largo, pa e tabata un señal hopi positivo, pues e tin tur speranza cu su cliente no lo

worde deteni un biaha mas.

ABOGADO DI DEEPAK: Prensa a combersa cu abogado Ruud Offringa tambe, kende a representa Deepak Kalpoe, pa motibo cu segun Offringa, Oomen tabata cansa y el a dicidi di tuma un vacantie.

Offringa mescos cu Kock a indica cu Fiscal no a trece nada nobo dilanti.

DIARIO a puntra Offringa cu si acaso Fiscal gana e apelacion y su cliente worde deteni un biaha mas, si e por apela esaki.

Offringa a splica cu esaki lo no ta posibel.

Pa loke ta e echo cu Procurador General mes a presenta pa e caso, e abogado a splica cu esaki ta nada straño pa un caso di apelacion.

Abogado Offringa a splica cu semper por tin sorpresa, sinembargo e ta hopi optimista.

ABOGADO DI JORAN:

Despues cu e abogadonan di e rumannan Kalpoe a sali for di corte, a toca turno na abogado di Joran van der Sloot esta Anthony Carlo a combersa cu prensa.

Segun Carlo kende tabata hunto cu su coleganan de Bie y Richie Kock, hof a scucha argumentonan di e abogado y di e Fiscal y a splica cu e decision lo worde duna riba Diahuebs.

Abogado Carlo tambe a bisa cu no tabata tin pruebanan nobo y cu segun e, e motibonan legal pa sigui

prolonga detencion di van der Sloot no ta presente.

Pa loke ta e limitacionnan cu Fiscal kier bolbe impone riba su cliente, e abogado a splica cu ta trata di asuntunan manera si e tin derecho di haya corant y cu e mester ta su so den cel.

E abogado a splica cu Ministerio Publico no tin derecho di bolbe impone limitacionnan riba su cliente. Ora cu a puntra Carlo si echt nada nobo a worde treci pa dilanti pa Fiscal el a duda un rato y el a bisa cu nada "echt" nobo a bin dilanti.

JORAN DI BERDAD A BISA CU-EL A DERA NATALEE: Ora cu DIARIO

a puntra e abogado si ta berdad cu Joran van der Sloot despues cu el a worde deteni, a bisa cu e y e rumannan Kalpoe a dera Natalee Holloway, e abogado a bisa cu esaki ta absurdo.

Ora cu un otro miembro di prensa a bisa Carlo cu un otro abogado cu si a mira e documentonan, a conclui cu esey di berdad tabata e prome declaracion di Joran, mesora e cara di Abogado mr. Carlo a cambia, y kier a haya sa ta cua abogado a mira e "stukken".


Ora cu e miembro di prensa a bisa Carlo cu ta abogado di Satish a bisa cu e tin e documentacion ariba cual esaki ta para, abogado Carlo a bisa cu ta straño cu e no a haya e documentonan aki.

El a finaliza na bisa cu su cliente ta mantene su inocencia.


E declaracion di abogado mr. Carlo, a worde ripiti anochi atrobe na TV Mericano, incluyendo esun di Primetime with Nancy Grace na CNN Headline News.

Abogado di Joran a duna mesun contesta riba e prome declaracion di su cliente, pero riba pregunta di Nancy, e no kier a bisa nada si e ta kere esey of no.

DIARIO ta keda para tras di e noticia di Dialuna, como cu el a worde confirma pa varios abogado, incluyendo fuente hopi involucra den e investigacion actual.



Abogado mr. David Kock cu su cliente Satish Kalpoe.



Joran ta yegando aki na edificio di Corte.